

周禮完解

周禮完解卷三

郝敬習

地官司徒第二

地官官象地也。司主也。徒民也。以地象官。而所司不專在地。以民爲司。而其官不專主民。民以任地。地以養民。無土地則無以爲養。無人民則無以立國。故司民莫如地官也。天道知始。地道作成。官莫尊于冢宰。而事莫多于司徒。冢宰與王爲體。司徒併職爲臣。冢宰之權莫大于詔王。而師保亦司徒也。莫急于財賦。而泉府亦司徒也。莫重于爵祿。而司祿亦司徒也。宗

伯掌禮而祭祀犧牲粢盛牧人牛人春人饌人亦司徒也司馬掌征伐而伍兩卒旅徒役車輦金鼓門關亦司徒也司寇掌刑而司暴司稽亦司徒也至于司空國邑水土孰非地事昔唐虞命司空平水土命后稷教稼穡命司徒敷五教是書水土稼穡五教併委諸地官故五官惟司徒兼任責成所以爲地道而代有終也地官作成代終故冬官無職三時之事總役于地萬物冬藏百昌歸土故冬終也終則無始冬官司空空則無事苟冬月而水泉溢土膏動則地失其職故水土國邑不得不屬地官地官任水土國邑則

冬官欲自爲事不可得已故司空者考功而已然則司空不預地事而司馬又領職方何也司馬掌閫外者也司徒掌邦畿千里以內立國根本職方土方東漸西被之事必根本強固而後東征西討遠人可蕩平故司徒之職爲獨重管子作內政寄軍令此之謂也

惟王建國辨方正位體國經野設官分職以爲民極乃立地官司徒使帥其屬而掌邦教以佐王安擾邦國首五句解見天官辨方經野則天位乎上地位乎下以此設官分職地官所以繼天也古者以司徒教民

而是書謂司徒爲地官何也易曰乾知大始坤作成
物地者萬物所以致養民得養而生得教而成生與
成皆地故曰衣食足則生禮義逸居無教則近于禽
獸養與教因司民者兼焉地官土德黃中通理柔順
貞固厚德載物故尊莫如天親莫如地尊者分嚴親
者情篤情篤則任重而事煩故五官唯司徒屬多而
包舉冬官蓋水土和則物生土制水則教成富而教
司徒所以爲安擾而兼事典也不富則不可教先教
後養則失其養故冬官之職不待五官終而司徒先
之貞起元良成震藏冬于地所以承天而資春氣故

謂之辨方正位也。五官皆佐邦國，獨司徒言安。又言擾擾饒也。富而教，故饒豐多事，故擾。

教官之屬

教官卽大司徒屬。謂小司徒以下職七十有八。其人二萬七千五百有奇。

大司徒卿一人，小司徒中大夫二人，鄉師下大夫四人，上士八人，中士十有六人，旅下士三十有二人，府六人，史十有二人，胥十有二人，徒百有二十人。

卿卽大司徒，小司徒大司徒之副，中大夫以下遞相爲副。說見大宰。天子畿內附郭之地，分爲六鄉，大司

徒主之故其副有鄉師

大司徒之職掌建邦之土地之圖與其人民之數以佐王安擾邦國以天下土地之圖周知九州之地域廣輪之數辨其山林川澤丘陵墳衍原隰之名物而辨其邦國都鄙之數制其畿疆而溝封之設其社稷之壇俾而樹之田主各以其野之所宜木遂以名其社與其野

九州據司馬職方揚荊豫青兗雍幽冀并禹貢九州有徐梁而無幽并輪從也東西曰廣南北曰輪積土石曰山生竹木曰林流水曰川瀦水曰澤土高曰丘大阜曰陵水涯曰墳下平曰衍高平曰原下濕曰隰

名物猶言名色辨山林等名物欲得土地虛實之數以封建國邑也邦國謂諸侯之國多寡之數如王制云畿外八州州二百一十國之類都鄙之數謂王畿內三等采地如王制云畿內九十三國之類畿疆皆界也王畿千里中置王城四面各五百里邦國都鄙各有畿界界上爲溝溝上封土以爲阻固國之中門外右設大社大稷王社王稷中門外左設宗廟宗廟門屏前設勝國社稷累垣爲壇曰壇邦國都鄙樹木爲社以主田事各因其地所宜木爲名如宜松則名松社之野之類

按土地封建正地官之職說者欲割土地之事以補
司空然則安所稱地官乎今讀大司徒及其屬七十
有八文義事理井然明備爲世儒紛更割裂遂不復
足觀矣

以土會之灋辨五地之物生一曰山林其動物宜毛物
其植物宜阜物其民毛而方二曰川澤其動物宜鱗物
其植物宜膏物其民黑而津三曰丘陵其動物宜羽物
其植物宜覈物其民專四曰墳衍其動物宜介
物其植物宜莢火物其民皙而瘠五曰原隰其動物宜
羸羅上聲物其植物宜叢物其民豐肉而庠因此五物者

民之常而施十有二教焉。一曰以祀禮教敬則民不苟。
二曰以陽禮教讓則民不爭。三曰以陰禮教親則民不
怨。四曰以樂禮教和則民不乖。五曰以儀辨等則民不
越。六曰以俗教安則民不偷。偷七曰以刑教中則民不
競。暴八曰以誓教恤則民不怠。九曰以度教節則民知
足。十曰以世事教能則民不失職。十有一曰以賢制爵
則民慎德。十有二曰以庸致祿則民興功。

此言民生于地稟氣偏駁地官所以設教也。會計也。
計土地生人物之等。五氣發生于地。山林爲木。川澤
爲水。丘陵爲火。墳衍爲金。原隰爲土。人物之生各有

所肖動物飛走之類植物草木之類毛物狐貉之類
阜物橡栗之類阜房穀詩云旣方旣阜俗謂橡子爲
阜斗之類木氣生人其形多毛而方毛者木象方者
曲直之象鱗物魚龍之類膏物樹有膏脂者穀漆桐
柏之類鄭以膏作藥運夫之類宜水然此舉其氣類
非謂遂種于水也水氣生人其形多黑而津黑水色
津涎沫之類羽物翟雉之類覈核同果核梅李之類
火氣生人其形圓而長專圓同火旋繞故團炎上故
長介物龜鼈之類爽物阜炎之類金氣生人其形白
而瘦皙白也金色瘠瘦也金堅稜故瘦羸物毛淺虎

豹之類。叢物。叢生。荆棘之類。土氣生人。其形肥而短。庫短也。五物。卽所謂五地之物。萬物不離五氣。五氣不離五地。舍生之類。未有離地者。風氣不同。習尚亦異。地官所以因俗宜民而設教也。禮莫重于祭祀。故以祀禮教民。敬莫重于男女。男主陽。陽勝則爭。射爲陽禮。以教讓。女主陰。陰勝則怨。昏爲陰禮。以教親。樂禮以教和。儀禮以教序。偷作偷朝。不及夕曰偷。急則偷。教安其俗。則寬舒而不偷。刑。儀範也。爲之儀範。以教中。則有所檢束而不暴。誓。信誓也。教之盟誓。以相憂恤。則有所結約而不懈怠。教之制度。使擗節。則不奢。

修而知足。教之職事。使世守。則有常業而不失職。爵賢者。以教慎德。祿有功者。以教立功。此司徒十二教也。

按五地生物。似堪與家言。司徒設教。實不以此。孟子述堯命契爲司徒。教以人倫。父子有親。君臣有義。夫婦有別。長幼有序。朋友有信。五者天下古今通誼。教之大原。釋此不言。旁衍十二。及荒政保息本俗等法。旣且疎矣。故是書多緯裨雜家之意。

以土宜之溲。辨十有二土之名物。以相民宅。而知其利害。以阜人物。以蕃鳥獸。以毓育草木。以任土事。辨十有

二壤之物而知其種以教稼穡樹藝

十二土謂十二州之土虞舜所釐也名地名物土宜民宅謂邑居利害謂高下向背寒煖各有所宜得則利失則害毓育同任土事治國邑分田里也壤熟田也知其種如高宜黍下宜稻之類樹藝種植也

以土均之灋辨五物九等制天下之地征以作民職以令地貢以斂財賦以均齊天下之政

土均均天下之土以平其賦也五物卽上五地生物九等謂上中下三壤因地肥磽爲賦多寡民職卽冢宰九職地貢卽九貢財賦卽九賦壤正賦均則天下

之政齊矣

以土圭之凴測土深正日景以求地中日南則景短多暑日北則景長多寒日東則景夕多風日西則景朝多陰日至之景尺有五寸謂之地中天地之所合也四時之所交也風雨之所會也陰陽之所和也然則百物阜安乃建王國焉制其畿方千里而封樹之

土圭以玉爲圭長尺有五寸夏至日午樹表八尺以圭量日景尺五寸合者其地卽天地之中也測土深謂地深不可見以土圭正日景測之蓋地與星辰四游升降進退不越三萬里夏至地東南游萬五千里

下降亦然。秋分復正，冬至西北游，亦萬五千里上升。亦然。春分復正，大約日景每千里差一寸，景尺五寸。是地南戴日下一萬五千里，爲地中心，與天心相對也。日南四者，申明一尺五寸得中之善。蓋地若大南，近日則景比土圭短，此南方氣多暑；地若大北，遠日則景比土圭長，此北方氣多寒。地若大東，近日出則于日中時，表景已偏東爲夕，此東方木氣多風；地若大西，近日入則于日中時，表景尚未正，如日初昇曰朝，此西方金氣多陰。惟日中表景與土圭合，無長短偏側，乃爲地中。天心地心會合，不寒不暑，四時之交。

時雨時暘風雨之會二氣冲和百物阜安乃可建王國也畿界也累土爲封植木爲樹

按此條之說是書所爲造端也惟王建國辨方正位體國經野皆指此以附會周公營洛之事謂王者建都地中外環九服內列郊遂都鄙如篇中所云皆緣飾堪輿伎方以爲經世要典其實迂誕不足信也昔者周公營洛爲東巡守朝諸侯均四方道里遠近非定爲王都也周自文武至幽厲世居西土成康盛時未嘗居洛至平王東遷而周遂衰矣地方六百里號令不行是書所稱畿內五等都邑畿外九服何嘗一

試于用故是書非已成之規後人臆說耳卽如土圭之法夏至日地南游去天中一萬五千里得景一尺五寸則是二分之一日地復正時表當無景何爲舍無景之表而反求諸一尺五寸之景乎吳澄氏篤信此書而于土圭地中之說亦不能掩其謬今錄其辯於左

吳澄氏云土圭之法不見于他經鄭氏謂周公居洛營邑于土中七年使成王居之夫成王未嘗與周公居洛也犬戎之難平王始遷居焉今指洛邑謂王國王畿成王居之豈不謬乎若但測景求地中不居又

不得謂之王國王畿矣王居何必地中堯都平陽舜都蒲坂文王居鎬非地中也賈氏云五帝以降惟湯居亳得地中堯舜不得地中而政令均天下治者以並在五岳內也周岐鎬處五岳外故周公東居洛邑此因襲鄭說而愈失之堯舜文武若不施仁政于民雖居地中何益徒居地中與五岳內卽能使政均天下乎此陋儒之見也今潁川陽城世謂地中周公置表于此然則周公何不卽都陽城乃去營洛洛去陽城遠矣旣求地中又不以爲都何與又曰日南則景短多暑日北則景長多寒日東則景夕多風日西則

景朝多陰鄭氏云日景于地千里而差一寸南表千里景短一寸北表千里景長一寸若千里差一寸萬里乃差一尺日月麗天萬里同晷才去千里之間地中得正時東景已夕西景方朝若然是夏至之日東去地中千里之人以西方之朝爲夕西去地中千里之人以東方之夕爲朝使相去數千里之外者皆當以晝爲夜以夜爲晝矣雖蠻夷之地窮日際月窟所居亦不至是昔堯命羲仲宅嵎夷命羲叔宅南郊命和仲宅昧谷命和叔宅幽都皆以觀日景出入長短陰陽氣候偏正未聞四方日景之異如此又曰天地

所合四時所交風雨所會陰陽所和夫中國居天地
中惟其外有東夷南蠻西戎北狄而內爲中也蠻夷
之地或相信徙或相什百在四夷之域廣輪自不同
今但指中國內一洛邑以爲天地之合四時之交可
乎謂營洛邑居天下之中使四方道里均則可謂天
地必合于此四時必交于此無是理風雨會陰陽和
在人君德應天心何如若但居洛邑以和陰陽會風
雨空言耳蓋因周書召誥有王來紹上帝自服于土
中之云故文飾其說不知書云土中但謂道里均耳
使周公以土圭測景求地中書載營洛事甚詳豈得

不言學者知成王未居洛則知地中之說爲非

凡建邦國以土圭土其地而制其域諸公之地封疆方五百里其食者半諸侯之地封疆方四百里其食者參之一諸伯之地封疆方三百里其食者參之一諸子之地封疆方二百里其食者四之一諸男之地封疆方百里其食者四之一

上言建王畿此言建侯國土其地猶言度其地土圭測景之法每千里差一寸百里差一分假令封上公地五百里于北畔立八尺之表夏至晝漏半得尺五寸景與土圭等于南畔亦立八尺之表得四寸五分

比北減五分。一分百里。五分則五百里。以封公減四分。則四百里。以封侯減三分。則三百里。以封伯減二分。則二百里。以封子減一分。則一百里。以封男是謂土其地而制其域。其食者半。謂所自入爲養者。公僅二百五十里。其餘則爲陵麓城郭不耕之地。及境內名山大川不以封者。及所納貢王田共居半。故公所自食纔得半。侯地四百里。實食一百三十三里有奇。伯地三百里。實食一百里。子二百里。實食五十里。男一百里。實食二十五里。

按此條封建之制。與孟子王制相矛盾。孟子云。天子

之制地方千里。公侯方百里。伯七十里。子男五十里。
王制與孟子合。論語子路冉有論爲邦。子路居千乘。
夫子哂之。冉求謙居六七十里。與五六十里。可知千
乘卽公侯百里。六七十里卽伯。五六十里卽子男。皆
未有諸子二百里。諸男百里之說。曾子論人才云。可
以寄百里之命。亦甚言其大國。大無過百里。孟子云。
周公封魯。太公封齊。皆方百里。戰國時魯地方五百
里。孟子謂有王者起。魯在所損。其言甚明確。且云此
大畧。其詳不可得聞。諸侯惡其害已而去其籍。向使
周室封國果如是書所云。孟子安得不聞其大畧。明

白易曉者如此。尚得不信乎。是書所言。蓋戰國以來。處士臆見狹小。先王封建。如上公地百里。除山川林麓城郭街巷三分去一。卿大夫士百官之廩祿。朝覲會同。宗廟祭祀。賓客喪紀等費。一切取給。又九貢九賦。歲有常征。皆在百里內。誠若有不足者。蓋先王之世。分田雖少。取下有制。故諸侯無貧寡之患。後世無名之斂。日益而地有限。于是有不共不享之國。相兼相併之謀。議者歸咎封建太狹。乃酌爲五百里四百里等制。視先王之數。不無大增。而視七王吞併。亦爲省矣。故儒者謂周禮眞周公之法。夫周室封建。自武

王始武王甫崩公與幼主輒取先王成命紛更已爲非禮況增地數倍勢必併國四五而爲一又將何地以處受併之國其無此事明矣鄭氏疑其言與孟子不合曲爲解云所食之外皆爲附庸今以公地五百里半爲附庸則是一公五附庸天下附庸國當數倍公侯矣二百五十里是孟子所謂子男之國五也與所謂不能五十里爲附庸者不合餘倣此推之皆非也鄭又謂食半三之一四之一者公之地一易侯伯之地再易子男之地三易夫壤有三則春種秋成則一未聞有間一歲再歲至三歲始一成者三易之說

亦自此書杜撰若有之則公侯伯子男皆當兼有如
鄭說是天下一易地盡以封公再易地盡以封侯伯
三易不堪之地盡以封子男而不易之善地五諸侯
曾不得尺寸焉豈理也哉鄭又謂諸男食者四之一
適方五十里獨此與五經家說合則是子男四之一
者謂實在可耕之田也與前所謂三易之說又自相
背矣四之一爲田則四之三皆山林城邑等地是何
子男之國獨田少而山林等地偏多乎皆難強通昔
人謂之瀆亂不驗誠然

凡造都鄙制其地域而封溝之以其室數制之不易之

地家百畝一易之地家二百畝再易之地家三百畝乃分地職奠地守制地貢而頒職事焉以爲地灋而待政令

上言建侯國此言造畿內都鄙之法都鄙者王子弟公卿大夫之采地有三等皆在王畿郊遂二百里之外三百里爲稍地四百里爲縣五百里爲都稍爲家邑大夫之采地縣爲小都卿之采地都爲大都公之采地王子弟親者在大都疏者在小都與家邑九夫爲井四井爲邑四邑爲丘四丘爲甸四甸爲縣四縣爲都家邑二十五里小都五十里大都百里王制云

畿內九十三國卽此三等之國邑也皆所謂都鄙之制各有地域各爲封溝別之以其室數制之謂室在城田在野因城內居室之數爲野外丘甸之制王制云量地以制邑度地以居民地邑民居參相得是也不易之地地本膏腴不治自成者易治也孟子云易其田疇凡田肥美者不勞而治故曰不易一易者功倍再易者功兩倍三易者功三倍今之下地有三耕三糞然後熟者是也以上田家百畝爲率中田倍與下田再倍與肥者分少瘠者分多也分地職卽冢宰九職三農生九穀園圃毓草木之類奠定也定地守

如左傳晏子云山林之木衡麓守之藪之薪蒸虞侯守之之類制地貢卽大宰九賦九貢頒職事頒官司所職掌之事待政令待徵收也

按鄭解不易再易三易爲閒一歲或二三歲一種以休土力非也田一歲不種則荒再歲三歲不種則鞠爲茂草矣或者以代田法解之代田半壠半畝更番而種無地不可爲何分一易再易三易本謂中田二百畝下田三百畝乃可敵上田百畝以多補瘠其實非也蓋肥磽厚薄無地無之豈一都一邑肥者全肥瘠者全瘠而盡以分一家一夫乎旣云八家同井又

以多寡三等爲差。則中地一井繞四家。下地一井繞三家。然則立甸之法亦亂矣。地旣磽瘠。雖多無補。人力不給。同爲曠土。豈法之善乎。大抵是書詳于剔弊。而弊乃愈甚。皆此類。

以荒政十有二聚萬民。一曰散利。二曰薄征。三曰緩刑。四曰弛力。五曰舍禁。六曰去幾。七曰審禮。八曰殺。九曰。九曰蕃樂。十曰多昏。十有一曰索鬼神。十有二曰除盜賊。

荒政救荒之政。年飢民散。故有政以聚之。散利。賑貸。弛力。省興作。舍禁。公山澤。去幾。通關市。審禮。裁繁費。

殺哀節喪紀。蕃樂多爲歡娛。多昏。使夫婦相守。索鬼
神。攘凶災。除盜賊。防剽掠也。

按蕃樂以聚民本迂。鄭作藩。藏樂器尤迂。

以保息六。養萬民。一曰慈幼。二曰養老。三曰振窮。四曰恤貧。五曰寬疾。六曰安富。

保息謂保愛使蕃息。無親曰窮。無財曰貧。振收也。恤憐也。疾殘廢者。寬免役也。安富。民富者。不專責之。使保其富也。

以本俗六。安萬民。一曰燬宮室。二曰族墳墓。三曰聯兄弟。四曰聯師儒。五曰聯朋友。六曰同衣服。

本俗因民俗也。緣俗則民安。六者皆所謂因民而治。不革其故。生有宮室。死有墳墓。民莫不欲其美而聚也。兄弟謂昏姻。聯相親也。師儒。儒爲人師者。同師曰朋。同志曰友。聯師儒。同學也。聯朋友。同業也。同衣服。不違俗也。

正月之吉。始和。布教于邦國都鄙。乃縣教象之灋于象魏。使萬民觀教象。挾夾日而斂之。乃施教灋于邦國都鄙。使之各以教其所治民。

解見大宰

令五家爲比。使之相保。五比爲閭。使之相受。四閭爲族。

使之相葬五族爲黨使之相救五黨爲州使之相賙五州爲鄉使之相賓

比閭族黨州鄉各有長使其長使卽上云各以教其所治民也保保任不爲非五比二十五家受有事相寄託四閭百家百家聚族多五服之親有葬則相助五族五百家有急則相救五黨二千五百家有凶荒則相賙五州萬二千五百家有賢才則相賓禮

頒職事十有二于邦國都鄙使以登萬民一曰稼穡二曰樹藝三曰作材四曰阜蕃五曰飭材六曰通財七曰化材八曰斂材九曰生材十曰學藝十有一曰世事十

有二曰服事

此與大宰九職相通。天官掌之。而地官頒行之。天施地生。富而後教。足國安民之要。莫大于此。地官所以獨重也。稼穡卽三農生九穀。樹藝卽園圃毓草木。作材卽虞衡作山澤之材。阜蕃卽藪牧養蕃鳥獸。飭材卽百工化飭百材。通財卽商賈阜通貨賄。化材卽嬪婦化治絲枲。斂材卽臣妾聚斂疏材。生材卽閒民無常職。轉移職事。無業而營。與作飭化斂者同有事。故曰生材。學藝學道藝者。世事。四民各守世業。服事。服勤公家之事。

以鄉三物教萬民而賓興之一曰六德知仁聖義忠和二曰六行孝友睦婣因任恤三曰六藝禮樂射御書數三物猶言三事卽德行藝也興起也鄉大夫以三事教民旣成賢能者賓禮作興之德道得于心行躬行藝材能明曰知愛曰仁通曰聖宜曰義直曰忠順曰和六者皆道得于心子順曰孝弟恭曰友親九族曰睦親外親曰婣相信曰任相愛曰恤六者德徵于行禮儀容樂聲音射弓矢御車馬書文字數計算鄭謂五禮大宗伯之吉凶軍賓嘉六樂雲門大咸大韶大夏大濩大武五射一曰白矢謂矢貫侯見其鏃白二

曰參連謂前放一矢後三矢相連續三曰剡注謂羽高鏃低其去如削剡然也四曰褭尺謂臣與君射不敢並立讓君退尺五曰井儀謂四矢貫侯如井之儀五御一曰鳴和鸞和在軾鸞在衡皆鈴也二曰逐水曲謂車行如水順曲而流三曰過君表詩毛傳謂裼纓旃以爲門裘纓質以爲櫛間容握驅而入擊則不得入也四曰舞交衢謂車在交道旋應舞節五曰逐禽左謂田車逆驅禽獸使左當君以射六書許氏說文一曰象形如日月之類二曰會意如人言爲信止戈爲武之類三曰轉注如令長之類四曰處事如上

下之類人在一上爲上人在一下爲下各有其處事
得其宜五曰假借如能索之類一字兩用六曰諧聲
如江河之類以形合聲九數據九章算法一曰方田
以御田疇界域二曰粟布以御交貨變易三曰差分
以御貴賤稟稅四曰少廣以御積算方圓五曰商功
以御功程積實六曰均輸以御遠近勞費七曰盈朒
以御隱雜互見八曰方程以御錯糅正圓九曰句股
以御高深廣遠

以鄉八刑糾萬民一曰不孝之刑二曰不睦之刑三曰
不嫺之刑四曰不弟之刑五曰不任之刑六曰不恤之

刑七曰造言之刑八曰亂民之刑

刑以弼教糾約束也六刑者六行之反德藝或限于材質六行秉彝人皆可能而自暴棄故刑以糾之造訛言以惑衆挾左道以亂政二者尤民行所以壞故並刑爲八

按造言亂民二種之刑用之不善卽申商之令誹謗妖言之法由斯作俑先王立木求謗豈有造言之禁以五禮防萬民之僞而教之中以六樂防萬民之情而教之和凡萬民之不服教而有獄訟者與有地治者聽而斷之其附于刑者歸于士

五禮卽五典。六樂卽六律。民多詐僞。則機變巧佞。似中非中。民多情慾。則荒淫流蕩。似和非和。故防僞以教中。防情以教和。訟成刑曰獄。獄未成曰訟。鄭謂爭罪曰獄。爭財曰訟。未然有地治者。鄉州及都鄙等官。與猶使也。聽其訟。斷其獄。附麗也。士獄官。

祀五帝。奉牛牡。羞其肆。享先王。亦如之。大賓客。令野脩道委積。大喪。帥六鄉之衆庶。屬其六引。而治其政令。大軍旅。大田役。以旗致萬民。而治其徒庶之政令。若國有大故。則致萬民於王門。令無節者。不行於天下。大荒大札。則令邦國移民通財。舍禁弛力。薄征緩刑。歲終。則令

教官正治而致事。正歲令于教官曰。各共爾職脩乃事。以聽王命。其有不正。則國有常刑。

五帝五方天神。坤爲牛。故地官奉之。奉牛牲。國語所謂禘郊之事。則有全烝。先全烝。然後豚解而腥之。曰肆。脩道平治道路。委積薪米之類。少曰委。多曰積。六鄉王畿百里內。分爲六鄉。引輓軀車之索。六鄉主六引。六遂主六紼。相代紼卽引。在道曰引。在棺曰紼。樹旗爲表。期民于下。衆至而弊。後者誅。所謂治其政令也。大故王喪及寇兵也。致萬民于王門。備非常也。節。謂旌節。行道通關。用以爲信。無節不得行。見掌節職。

大荒年飢大札疫死移民以口就食通財移粟就民
歲終周十二月教官司徒之屬正治整飭文書致事
上計簿也正歲建寅之月

小司徒之職掌建邦之教灋以稽國中及四郊都鄙之
夫家九比之數以辨其貴賤老幼廢疾凡征役之施舍
與其祭祀飲食喪紀之禁令

小司徒職見大司徒國中謂王城四郊謂六鄉百里
內都鄙兼采地夫家長家一夫之家九比上中下三
等各三爲九比檢校也貴者免役賤者供役強壯者
施之老幼廢疾者舍之施猶加舍釋通免也論語云

勿施勞。君子不施其親。鄭作弛非也。飲食如鄉飲酒。族食之類。禁令謂皆有制度。不使違越。

乃頒比灋于六鄉之大夫。使各登其鄉之衆寡。六畜車輦。辨其物。以歲時入其數。以施政教。行徵令。及三年則大比。大比則受邦國之比要。

比灋。卽上九比。登登簿籍。衆寡謂夫家之數。六畜謂民家所畜六牲。駕牛馬曰車。入挽行曰輦。皆任載之具。辨其物。謂辨其財用之物。歲時謂每歲四時。貧富消長。鄉大夫以數入于小司徒。施政教。行徵令。皆兼鄉遂大比。謂簡閱天下戶口之數。比要謂諸侯所獻。

戶籍

按鄉大夫以六卿領六鄉其秩尊于小司徒而小司徒則中大夫頒其法于六鄉以徵其比要于政體不倒行乎戶口多寡不可不稽然而生死消長旦夕不侔以至六畜車輦新故之數欲一一搜括登記四時稽比無論煩瑣勞碌勢不可行就使必行閭閻騷擾殆無寧日所謂與之天下不能一朝居也孰是書用之誤蒼生多矣

乃會萬民之卒伍而用之五人爲伍五伍爲兩四兩爲卒五卒爲旅五旅爲師五師爲軍以起軍旅以作田役

以比追胥。以令貢賦。

天子六軍。出自六鄉。卒伍者。軍衆之通稱。百人爲卒。五人爲伍。用卽下文軍旅田役追胥之用。五人爲伍。下皆因民制兵之法。民有比閭族黨州鄉。卽兵之伍。兩卒旅。軍師民出爲兵。家各一人。五家爲比。則五人爲伍。五比爲閭。則五伍爲兩。由此以至軍師。二千五百家爲州。卽二千五百人爲師。萬二千五百家爲鄉。卽萬二千五百人爲軍也。起軍旅。謂征伐作田役。謂田獵工役追胥。謂逐捕寇盜。令貢賦。謂按伍兩之法。稽夫家之數。以徵令貢賦。則無隱漏之蔽矣。

按軍旅之政大司馬事司徒會而用之卽管子作內政以寄軍令藏器于無形也。然是書之法一家授地不過百畝以養六七人。雖有豐年輸稅供器之餘僅取餬口。歲時烝嘗吉凶慶弔費且不給。則古之爲民者無千指之家無二頃之田亦甚貧寡矣。倉卒有急比屋索賦冒死從征。雖父母妻子四五人必責一人往。如采薇出車三年而後得返。伍伍相仍無一家得免者。然則古之爲民豈不艱難貧苦十倍後世乎。後世貧者無田亦無役富者兼併亦無隱漏兵雖勞苦而官有厚廩民雖輸賦而家無遠役。然則古今之法

孰得孰失。好信者。未可全是。古而非今也。

乃均土地。以稽其人民。而周知其數。上地家七人。可任也者。家三人。中地家六人。可任也者。二家五人。下地家五人。可任也者。家二人。凡起徒役。毋過家一人。以其餘爲羨。唯田與追胥竭作。

均土地。授田也。稽。人民因土地以計民家。可任。不可任之數。以爲徒役之例。一家男女七人以上。則授上田。所養者衆也。五人以下。授下田。所養者少也。任。謂強壯可任用者。三五二人。皆除家長。以家衆男女。強弱半計之。上地家七人。除家長。餘六人。可任者半。則

三人也。中地家六人。除家長餘五人。可任者半。則二人半也。不得言半人。故併二家言五。下地家五人。除家長餘四人。可任者半。則二人也。凡軍施工役。家出可任者一人。餘爲羨閒之卒。唯田獵與追捕盜賊。則一家可任者並出。

按天下神器。不可挾術用智。數米揀髮。而望其必理也。數天下之民以授之地。計天下之家以數其人。若是書所云。雖十室之邑。不可理也。孟子曰。物之不齊。物之情。今欲計夫家以均土地。七人上地。六人中地。五人下地。不惟家與地錯難齊。生齒盈虛亦何常。假

今上地一家七口遇凶札流亡僅存一二則所受地
又當改置紛紛日亦不足管仲霸齊句踐報吳商鞅
強秦欲速見小苟且而爲此非蕩平遠畧也分田制
里欲勿擾之耳今雖百口之家一人遠出一家倚閭
況家止數口壯丁不過二三以耕耘不足又責一人
往役愚深惟斯時爲斯民者之貧且苦也而執以爲
周公良法豈智愚之見遠不相及邪

凡用衆庶則掌其政教與其戒禁聽其辭訟施其賞罰
誅其犯命者凡國之大事致民大故致餘子

用衆庶卽用六鄉之衆致民謂招集衆民餘子謂外

卿大夫之子有事則入守王宮

按起徒役用衆庶皆掌之司徒司馬雖專征伐而不得徵調雖用兵而不得養士其簡閱練習輜重餽餉盡屬司徒地官所以兼民事也世儒欲改屬司空非作者本意

乃經土地而井牧其田野九夫爲井四井爲邑四邑爲丘四丘爲甸四甸爲縣四縣爲都以任地事而令貢賦凡稅斂之事乃分地域而辨其守施其職而平其政此言授田之法由鄉遂至都鄙邦國皆因古井田衍其制自一井九夫推至萬夫也半步爲武二武爲步

步百爲畷。畷百爲夫。夫九爲井。井共九區。則是寬一步。長三百步。爲一里。四方一里。縱橫界爲三段。其形如井。井九區。區百畷。每夫受田一區。故曰九夫爲井。四井方二里。爲邑。四邑方四里。內開方成十六井。爲丘。四丘方八里。內開方六十四井。爲甸。四甸方十六里。內開方二百五十六井。爲縣。四縣方三十二里。內開方一千二十四井。爲都。必以四加者。方則必四止。于都者。都九千二百一十六夫。則萬家之地。三十里也。詩云。十千維耦。終三十里。由此推之。四海九州之田。皆可知。牧。謂隰臯水草之地。以牧養六畜者也。有

可耕之田必求可牧之地六畜有所養然後不傷稼
穡故有井必有牧古井地非必盡相連屬衍沃則爲
井隰臯則爲牧丘陵亦可牧也任地事謂任民以耕
治之事令貢賦謂使之納貢稅出軍賦凡稅斂之事
通邦國都鄙皆小司徒掌之分地域謂分鄉遂都鄙
邦國辨其守謂虞衡之屬施其職謂九職任民平其
政謂正其貢賦

按鄭謂牧卽井九夫爲牧二牧當一井蓋因大司徒
造都鄙制地有一易再易三易春秋傳云井衍沃牧
隰臯遂謂牧爲隰臯率二牧當一井引左傳夏少康

有田一成有衆一旅爲徵夫旅之爲五百家與成之爲百井皆後世創立名法夏后氏五十而貢未言井也何爲以二牧當之少康有衆五百人有田百井非謂卽以五百人分百井之地也豈可遂爲二牧當一井之徵小司徒貳大司徒治六鄉此正六鄉事鄭因孟子云請野九一而助國中什一使自賦以此專爲都鄙世儒乃謂鄉遂用貢十夫有溝都鄙用助八家同井不知孟子之言爲用助者通變非謂井但行于都鄙不可行于國中也國中城郭園圃宮室街巷錯不可井故但十分稅一如寬閒可井未嘗不井野外

平曠用助。若遇險阨。什一自賦。又何不可。此古井牧所以旁行不滯也。是書摹倣古制。局于名法。已失之瑣。鄭固執附會。不察理之是非。與勢之可否。夫九州獨中原地平行。亦未有延袤數百里不少高下參差者。少參差。卽溝洫深淺不可通濟。欲如所謂四井爲邑。四邑爲丘。四丘爲甸。四甸爲縣。四縣爲都。若司馬法并十爲通。通十爲成。成十爲終。終十爲同。川澮相連。千里無礙。盡四海之地。不得一而必曰都鄙盡用助。所以井牧爲畫餅而終不可行也。然先王所以必欲井其地。何也。此均田制賦易簡良法。一里一井。則

地易分一區百畝則田易辨中公外私則賦易清國
有大小地有遠近惟井則分田制祿可坐定一夫一
區則民皆受地卽一夫力能兼數區而區定夫終不
可隱九夫共一井則地皆任民卽一井不必具九夫
而田定賦亦終不可缺故正經界制穀祿莫如井而
行井則貴相地輔之以貢然後可通行如是書比閭
族黨以編其居卽井邑丘甸以聯其田必使遠邇無
間鄉遂全貢都縣全助如鄭之尺寸比擬四尺爲溝
八尺爲洫丈六爲澮四里一丘八里一甸十六里一
縣三十二里一小都六十四里一大都甸四面加一

里爲溝洫以合十里之成四甸方二十里爲縣四縣
方四十爲都四都方八十里旁加十里爲潯共方百
里成同而後井田之法備如是則必有百里平地如
掌者然後可試此法宜乎井牧爲絕跡矣縣之爲名
取繫屬春秋楚滅陳以爲縣秦漢邑屬州郡者皆曰
縣周禮成于後世故襲稱如王制稱畿內爲天子之
縣漢書稱郡邑吏爲縣官之類鄭註禮記謂縣爲夏
世王畿名以周禮爲古也禹貢具在未聞夏后氏有
縣名者

凡小祭祀奉牛牲羞其肆小賓客今野脩道委積大軍

旅帥其衆庶小軍旅巡役治其政令大喪帥邦役治其政教凡建邦國立其社稷正其畿疆之封凡民訟以地比正之地訟以圖正之歲終則攷其屬官之治成而誅賞令羣吏正要會而致事正歲則帥其屬而觀教灋之象狗以木鐸曰不用灋者國有常刑令羣吏憲禁令脩灋糾職以待邦治及大比六鄉四郊之吏平教治正政事攷夫屋及其衆寡六畜兵器以待政令

小祭祀謂祭山川社稷之類羞肆見大司徒小賓客謂諸侯之使大軍旅謂天子親征小司徒帥六鄉之衆而致之于大司徒小軍旅謂命將出師巡役巡視

工役皆小司徒治其政令。大喪帥六鄉之衆供引窆。復土之役。政教謂造作之法。建邦國。謂分封諸侯。世儒以掌營國邑爲司空。若此文爲地官事。甚明。豈得謂錯簡乎。民訟地訟。謂田連井牧。居連比閭。有事相訟。按地比而知遠近親疎之故。爭地相訟。閱地圖而知疆界侵越之由。屬官地官之屬。日計曰成。考其爲治之計簿而行誅賞。月計曰要。歲計曰會。各正治其簿書。而致其所治之事。正歲以下。解見前。六鄉四郊之吏。比長閭胥之屬。夫屋猶夫家。主家長曰夫。合家衆曰屋。鄭謂夫三爲屋。屋三爲井。出地貢者。三三相

任附會六鄉用貢之說攷夫屋攷其新故死徙之數六畜兵器皆夫屋所有待政令聽賦役也

鄉師之職各掌其所治鄉之教而聽其治以國比之灋以時稽其夫家衆寡辨其老幼貴賤廢疾馬牛之物辨其可任者與其施舍者掌其戒令糾禁聽其獄訟大役則帥民徒而至治其政令旣役則受州里之役要以攷司空之辟以逆其役事凡邦事令作秩敘

鄉師職見大司徒下大夫四人分治六鄉故各掌所治國比卽小司徒九比之法鄉師佐之可任卽上中下地家三等可任之人施舍見前大役大興作至至

役所民出州里既至役各州里官記所作功謂之月
要以入于鄉師以司空造作之法攷之逆猶按也按
以司空程法不中者誅罰之凡邦事凡功役之事令
秩敘謂功有大小用人多寡有常序皆鄉師令作令
猶使也作猶爲也

按鄉師以司徒之貳考司空之辟則司空主考功而
司徒本兼司空甚明豈爲錯簡

大祭祀羞牛牲共茅蕝大軍旅會同正治其徒役與其
輦局輦戮其犯命者大喪用役則帥其民而至遂治之
及葬執燹以與匠師御匱柩而治役及窆執斧以泣匠

師

羞牛牲佐大司徒羞其肆也。菹苴同藉也。士虞禮束茅長五寸設于几東席上命佐食取黍稷等祭于苴。駕牛馬曰輦以載輜重人輓曰輦以載器用。簠翻通羽。幢匠師木工之長。匱柩同。天子之柩六引六鄉千人銜枚引之。鄉師執燹與匠師却行柩前指揮衆役下棺于壙曰窆。天子窆用六緋木爲豐碑四面置鹿盧縣棺而下。匠師用斧鄉師執以相助。

按匠師窆棺與下稽鄉器宜司空事而鄉師皆主之原非錯簡

凡四時之田前期出田濇于州里簡其鼓鐸旗物兵器脩其卒伍及期以司徒之大旗致衆庶而陳之以旗物辨鄉邑而治其政令刑禁巡其前後之屯而戮其犯令者斷其爭禽之訟

四時之田春蒐夏苗秋獮冬狩田濇謂人徒及所當用之器畫熊虎曰旗軍中用之示服猛也以司徒之大旗招集衆庶明司徒招之也陳謂軍陣行列有前後左右各以方色旗別之所謂物也有六鄉之衆有公邑之衆各辨別爲陣屯聚也陣有前後各爲屯聚巡視其不用命者戮之田以習戎故用軍法講武畢

從禽有爭禽訟者鄉師斷之不必詔之司徒也

按四時田事卽六鄉之衆大司徒所爲比閭族黨州鄉之民用小司徒伍兩卒旅軍師之法致之以爲兵因四時田獵簡閱教習齊以軍法此管仲寄軍令之術尋常田獵未有殺人者而皆掌自司徒所謂內政也鄭氏謂爲周公致太平之書曾有太平之書而以田獵殺人者乎

凡四時之徵令有常者以木鐸徇于市朝以歲時巡國及野而賙萬民之難阨以王命施惠歲終則攷六鄉之治以詔廢置

四時徵令有常。謂每歲常行。如月令孟春則命脩封疆之類。歲時每歲隨時。非限四時也。巡行視也。歲終周十二月。攷六鄉吏治。以告王。與冢宰廢置蓋鄉師爲地官之考也。

正歲稽其鄉器。比共吉凶。二服閭共祭器。族共喪器。黨共射器。州共賓器。鄉共吉凶禮樂之器。

正歲謂建寅之正月。鄉器謂一鄉所供吉凶禮樂之器。每歲六鄉行禮所需器用。歲首稽驗使預備也。五家爲比。供吉凶二禮之衣服。二十五家爲閭。供祭器。籩豆之屬。百家爲族。供喪器。夷牀。蜃車之屬。大司徒

職四閭爲族使之相葬故令供喪器二百五十家爲黨黨有序序者射也故令供射器如侯福豐中之屬二千五百家爲州三歲鄉貢士州長舉之卿大夫爲鄉飲酒禮賓之故州供賓器萬二千五百家爲鄉卽比閭族黨州之終吉凶禮樂之器卽吉凶祭喪射賓之器禮必有樂琴瑟鐘鼓之類皆鄉師稽攷之

按此卽今世官府取辦坊里之濫觴官取一則吏胥取二吏胥索之坊里坊里索之小戶坊里之費三而小戶之費十矣據是書取民之法不爲不密主財之途不爲不廣制用之術不爲不詳而吉凶禮樂之器

又以煩費小民民家一夫受田百畝有賦有貢有役焉有餘力以勝六司之徵求比長徵衣服閭胥徵祭器族師徵喪器黨正徵射器州長徵賓器鄉師徵吉凶禮樂之器民雖剝膚不能償此孟子云用其二而民有殍用其三而父子離曾是以爲周公之法與若國大比則攷教察辭稽器展事以詔誅賞

鄉師者大司徒之考也攷教攷州長黨正以下諸屬吏教民之勤惰察辭察諸吏之言辭辨其賢否稽器稽其材器所宜用展事展視其行事之實蹟上善者賞之極惡者誅之

鄉老二鄉則公一人鄉大夫每鄉卿一人州長每州中大夫一人黨正每黨下大夫一人族師每族上士一人閭胥每閭中士一人比長五家下士一人

司徒主民事以編戶聯民爲首務故其屬首鄉老王畿近郊百里分爲六鄉三公統之老者尊長之稱公卽鄉老每二鄉一公三公統六鄉鄉大夫鄉老之貳卿卽鄉大夫

按是書官莫要于司徒事莫急于聯民故六官則置六鄉是冢宰司徒以下六官分領六鄉也鄉各五州州以中大夫一人領之六鄉三十州凡中大夫三十

人州五黨黨一下大夫領之凡下大夫一百五十人
黨五族每族上士一人領之凡上士七百五十人族
四閭每閭中士一人領之凡中士三千人閭五比每
比下士一人領之共下士一萬五千人王制云天子
二十七大夫八十一元士已爲多矣今鄉老一職遞
相副貳至大夫百五十人上中下士一萬八千七百
五十人而六官之屬尚不與以取諸廷臣不足以除
自民間太冗其何位以處之何祿以分之行此法也
奚啻後世擢榷盤脫之爲濫而已乎据是書六官之
上無三公今所稱鄉老或卽後世所謂三老取諸鄉

薦紳之有齒德者而重其禮以爲公與故不敘其職事而所謂鄉大夫者職事皆奉法于司徒則非冢宰以下六卿可知亦抑有虛名而無爵秩者與而鄭氏皆以爲命官夫六鄉之民不過七萬五千家今官居民五之一五家爲比而占天子命士一人甚無謂也六鄉旣爾六遂復然王畿旣爾侯國復然官多于牛毛今密于繭絲豈周公之禮蓋作者欲寄軍令于內政什伍相維以馭其民假公卿大夫上中下士虛名以寓節制使平居指臂相使主帥偏裨尊卑上下之分定卽倉卒應變皆素練之兵矣殆世儒所謂桓文

之節制者與

鄉大夫之職各掌其鄉之政教禁令正月之吉受教灋于司徒退而頒之于其鄉吏使各以教其所治以攷其德行察其道藝以歲時登其夫家之衆寡辨其可任者國中自七尺以及六十野自六尺以及六十有五皆征之其舍者國中貴者賢者能者服公事老者疾者皆舍以歲時入其書

鄉大夫職見上六卿分六鄉故曰各掌其鄉正月周正建子之月教灋謂大司徒十二教等法鄉吏謂州長以至比長德行道藝卽鄉三物登謂書記夫家一

夫家男女也。國中王城野外都鄙七尺。年二十六尺年十五。國中役繁。故遲賦早免之。都鄙事簡。故早賦遲免之。鄭謂復多復少。恐非。征謂力役之征。舍謂免役入其書。謂征與舍皆登書以入于大司徒。

三年則大比。攷其德行道藝。而興賢者能者。鄉老及鄉大夫帥其吏。與其衆寡。以禮禮賓之。厥明。鄉老及鄉大夫羣吏獻賢能之書于王。王再拜受之。登于天府。內史貳之。

賢。謂有德行。能謂精六藝。衆寡。不齊之稱。指鄉州黨族之人。共相與尊禮賢能。以鄉飲酒禮禮而賓之。厥

明禮賓明日王再拜受重得賢也天府春官之屬掌祖廟之寶藏登其書于天府寶善也內史亦春官之屬掌王策命貳之謂藏其賢書之副待王命也

退而以鄉射之禮五物詢衆庶一曰和二曰容三曰主皮四曰和容五曰興舞此謂使民興賢出使長之使民興能入使治之

退謂進獻書于朝既退而以射詢于鄉蓋因賓興以勸勉衆人射本武事先王文之以禮樂爲鄉射禮以教鄉人五物卽和容等五詢衆庶謂鄉人衆多問其能是五物者進而與之射五物始終皆禮樂之事而

主皮居中。蓋射以禮樂始終也。和謂器宇冲和。容謂禮度從容。皮謂侯中棲皮爲鵠。主中也。主皮謂中而貫革巧力全也。和容之容與頌通。樂歌也。射有工歌如騶虞采蘋之類。歌一節發一矢。矢與歌應曰和頌。興動也。舞舞蹈樂容也。升降揖讓比耦履物執弓挾矢動與舞應曰興舞。卽春官大司樂云詔諸侯以弓矢舞也。興賢興能因民舉之。出長入治爲民用之。無非以民耳。出長謂離稠伍升爲長入治入鄉治事。此司徒所以賓興教民之意。

按鄭以五物當鄉三物。謂和載六德。容包六行。主皮

和容興舞當六藝之射禮樂甚牽強此言射耳與三物十八事何預又謂庶人射無侯故主皮鄉射鄉大夫爲主以爵則天子之卿射豈得無侯、

歲終則令六鄉之吏皆會政致事正歲令羣吏攻瀋于司徒以退各憲之於其所治句國大詢于衆庶則各帥其鄉之衆寡而致於朝國有大故則令民各守其閭以待政令以旌節輔令則達之

會政致事謂各會計其政而致其所治之事攷灋考求法度憲示也所治謂州長以至比長治事之處國大詢卽小司寇職詢國危國遷等于外朝是時鄉大

夫各帥六鄉衆寡之人各致所謀于朝守閭守二十五家之巷門凡命使必有旌節爲信以輔其令然後守閭者通之無旌節稱令者守閭止之妨姦盜也

按守閭無旌節不通行人此亦亂世嚴密之網非宜民之政

州長各掌其州之教治政令之灋正月之吉各屬其州之民而讀灋以致其德行道藝而勸之以糾其過惡而戒之若以歲時祭祀州社則屬其民而讀灋亦如之春秋以禮會民而射于州序凡州之大祭祀大喪皆蒞其事若國作民而師田行役之事則帥而致之掌其戒令

與其賞罰。歲終則會其州之政令。正歲則讀教灋如初。三年大比。則大攷州里以贊鄉大夫廢興。

州長中大夫職見鄉老六鄉共三十州。故曰各掌其州。教治教其所治之民。政令所以輔教。正月周正月。吉月朔。屬聚衆讀灋。讀一歲政令。及司徒十二教聚民宣誦。使知警省。州長一歲四讀法。正月之吉。春秋州社。正歲也。歲時謂每歲常期。祭州社謂春祈年。秋報成以禮會民射。以鄉飲酒禮會射。大祭祀謂祭州社稷。大喪謂王喪。泣事治事。作民起徒役。師征伐田蒐狩。行巡守役功作。帥帥各州之衆二千五百人致。

之鄉大夫與司徒掌其戒令賞罰州長自領其民卽
爲師帥以軍令行之會其州之政令謂考課黨正以
下正歲建寅之正月廢興猶黜陟也

黨正各掌其黨之政令教治及四時之孟月吉日則屬
民而讀邦灋以糾戒之春秋祭禘迎亦如之國索鬼神
而祭祀則以禮屬民而飲酒于序以正齒位

黨正下大夫職見鄉老六鄉凡一百五十黨故云各
掌孟月吉日四時孟月朔讀灋見上禘言營也營治
神壇曰禘春秋傳水旱癘疫不時於是乎禘之祭禘
則亦如四孟吉日讀邦灋黨正一歲七讀灋四孟吉

日春秋祭禋正歲也索鬼神之祭歲終大蜡也周禮以建亥之月以禮屬民以鄉飲酒禮合民也序黨序齒位長幼坐立之次鄉飲酒義云六十者坐五十者侍立之類

壹命齒于鄉里再命齒于父族三命而不齒

壹命謂初受天子命爲下士者再命天子中士三命天子上士齒于鄉在同鄉中人猶得與序齒若異鄉則別席而坐不論長幼再命又貴惟同姓父族得與序齒雖同鄉亦別席而坐三命愈貴雖父族亦別席而坐四命以上尤可知

按作者意以鄉人不知朝廷之尊故雖一命亦使得伸于鄉然非先王厚人倫重鄉黨之意天子之子入大學與士齒君我者猶若是而況一命再命之士不然何取于鄉飲酒禮爲也

凡其黨之祭祀喪紀昏冠飲酒教其禮事掌其禁戒凡作民而師田行役則以其灋治其政事歲終則會其黨政帥其吏而致事正歲屬民讀灋而書其德行道藝以歲時涖校比及大比亦如之

會其黨政謂攷課族師以下治功也致事致其吏事于鄉大夫書其道德行藝待三年賓興也校量其夫

家衆寡貧富消長之數爲比要也

族師各掌其族之戒令政事月吉則屬民而讀邦彙書其孝弟睦姻有學者春秋祭酺蕭亦如之以邦比之彙帥四閭之吏以時屬民而校登其族之夫家衆寡辨其貴賤老幼廢疾可任者及其六畜車輦

族師上士也職見鄉老六鄉七百五十族故云各掌其族月吉每月朔族百家一校學者萃焉每月初屬族人讀邦彙是一歲十二讀法多于黨也讀法之日卽詢衆論有德行藝者書記以待三年賓興酺言酺覺也合出錢飲酒曰酺禮器云周旅酬六尸其猶酺

與明堂禮乃命國釀漢法賜大酺卽釀也百家之衆春秋合錢祭社因共飲酒鄭謂酺爲人物災害之神又作步爲馬神誕也如之謂以祭酺時讀法書賢能邦比之法卽小司徒以九比稽國中都鄙夫家衆寡財用等事也

按夫家衆寡貴賤老幼六畜車輦之數事至瑣而督責甚煩小司徒比之鄉師比之鄉大夫歲時又比之黨正歲時又比之族師卽四閭之吏又比之閭胥又比之吏有多門民惟一而已千夫牧羊其無擾乎五家爲比十家爲聯五人爲伍十人爲聯四閭爲族八

間爲聯使之相保相受刑罰慶賞相及相共以受邦職以役國事以相葬埋若作民而師田行役則合其卒伍簡其兵器以鼓鐸旗物帥而至掌其治令戒禁刑罰歲終則會政致事

此節蓋內政軍令之要術特于此發之者軍法五五相聯自比至鄉獨族以四間爲限疑于不相聯屬故于此明之非獨族有聯耳自一比以至八間皆聯則推至黨州鄉皆聯可知族卽卒自一卒推至于旅師軍皆聯又可知十家爲聯則五家非自爲比也十人爲聯則五人非自爲伍也八間爲聯則四間非自爲

月利完集 卷三 四二 一
族也在鄉則計家在軍則計人在鄉爲比在軍爲伍
每家出一人故五家爲五人十家爲十人錯舉而言
見內政軍令相因也相保保不爲非相愛相寄託也
刑及賞共卽連坐之法邦職卽任民九職使各守生
業役國事卽師田等役相葬埋謂平居死喪相賙軍
中陣亡相收卹也合其卒伍以下皆詳言軍政帥而
至者間之長卽百夫之帥也

按是書之要歸于富強而主名法詳于名法者以求
爲富強也故天官六十財用是急地官六十簡閱爲
先比間族黨州鄉之民伍兩卒旅軍師之兵夫家衆

寡六畜車輦之數鄉大夫州長黨正族師閭胥比長之官皆以內政寓軍令而已管仲霸齊商君強秦皆是物也

閭胥各掌其閭之徵令以歲時各數其閭之衆寡辨其施舍凡春秋之祭祀役政喪紀之數聚衆庶旣比則讀灋書其敬敏任恤者凡事掌其比勸光撻罰之事

閭胥中士也職見鄉老六鄉凡三千閭故云各掌其閭徵令徵發使令春秋祭祀祭社也役政公家之役喪紀國有大喪數謂所用人數每有事聚衆輒讀法則閭讀法尤多于族也敬敏任恤者德行之士書以

備賓興也。凡事謂二十五家之中有過失之事當罰治者。閭師掌其比。釐。釐同。酒器。角爲之以罰失禮者。撻猶扑也。書云撻以記之。又云朴作教刑。二者皆罰事所以教也。

比長各掌其比之治。五家相受相和親有臯奇褻則相及徙于國中及郊。則從而授之。若徙于他則爲之旌節而行之。若無授無節則唯園土內人之。

比長下士。職見鄉老。六鄉凡一萬五千比。故云各掌其比。比凡五家相受猶相連相和親相親睦也。奇褻爲諸不法事相及相累也。徙遷居也。于國中自外遷

居城中及郊自城遷居郊外皆近也則比長從行親授其人于所遷地之吏使入籍明非逋逃也若徙于他鄉異國則與之旌節爲信而行若近徙無授遠徙無節是逋逃也所過呵問之聽其園土內之園土築土爲城以拘罪人園象天示仁也

按王者清平之世萬里如家何界障隔塞之有雖有門關之設以待暴客備非常豈以防吾平居之民往來移徙之衆今旣爲什伍以連之又使之相授相及以箝束之其有不便求徙者又要之以旌節責之以授受不如約者中道執而囚之民生此時如釜魚籠

鳥豈熙皞之天化國之日。讀者耳食爲周公之法。誤天下後世多矣。

封人。中士四人。下士八人。府二人。史四人。胥六人。徒六十人。

累土曰封。封人掌封國之事。故屬地官。次鄉大夫。諸職者。鄉大夫。諸職掌人民。封人掌社稷也。孟子云。民爲重。社稷次之。其掌牛牲何也。易卦坤爲牛。五行家丑爲牛。牛土獸。故封人兼之。或謂封人當屬春官。又謂當移補司空。夫司徒主人民。地官主土地。同也。孫叔敖城郢。使封人慮事。以授司徒。封人屬地官舊矣。

封人掌設王之社壝倖爲畿封而樹之。凡封國設其社稷之壝封其四疆造都邑之封域者亦如之。令社稷之職凡祭祀飾其牛牲設其福福衡置其綏雄共其水橐歌舞牲及毛炮之豚。凡喪紀賓客軍旅大盟則飾其牛牲。

王有三社三稷皆封人設爲壝累土爲圍曰壝畿王畿畿界也封土爲界而種樹于其上也。凡封國封諸侯之國都邑之封謂封王畿內大都小都家邑三等采地也社稷之職謂興守壇壝之人皆封人令之飾牛牲刷治精潔也福衡橫木牛角福持以止觸也綏

紉也以繩著牛鼻牽之水橐猶水草以飼牛鄭謂將殺牛洗以水藉以橐歌舞牲謂君親牽牲入廟封人歌舞云博碩肥腍以歆神也毛炮爛去毛炮之供薦羞也大盟謂大會同天子與諸侯盟

鼓人中士六人府二人史二人徒二十人

掌金鼓之事屬司徒何也鼓以齊衆樂記云鼓聲謹謹以立動動以進衆故三軍之衆將親持鼓司徒教衆鼓舞爲先

鼓人掌教六鼓四金之音聲以節聲樂以和軍旅以正田役教爲鼓而辨其聲用以雷鼓鼓神祀以靈鼓鼓社

祭以路鼓鼓鬼享以鼗黃鼓鼓軍事以鼙鼓鼓役事以
晉鼓鼓金奏以金錡對和鼓以金鐃陶節鼓以金鐃宋
止鼓以金鐃通鼓凡祭百物之神鼓兵舞帔弗舞者凡
軍旅夜鼓鼙威軍動則鼓其衆田役亦如之救日月則
詔王鼓大喪則詔大僕鼓

六鼓卽雷靈路鼗鼙晉六也四金卽錡鐃鐃鐃四也
教教擊鼓金雜比曰音單出曰聲凡作樂先鳴金後
擊鼓八音皆按金鼓曰節軍旅進退以金鼓齊曰和
田謂蒐狩役謂工作以金鼓爲號曰正教爲鼓教以
擊鼓之法辨聲用辨六鼓所用之聲祀天神曰雷鼓

祀地祇曰靈鼓祀人鬼曰路鼓用之軍中曰鼗鼓用之工役曰鼙鼓用之作樂曰晉鼓鼗大也鼙高也晉進也鞀人鼗鼓長八尺鼙鼓長丈二尺金奏以金奏九夏和以鼓賓入奏之曰晉錡錡于形似確頭上大下小作樂鳴之與鼓相和鐻鉦也形似小鐘軍行鳴之以爲鼓節鐻如鈴無舌有柄執擊之以止鼓軍卻則鳴鐻鐸大鈴有舌司馬振鐸則軍將以下皆擊鼓曰通祭祀百物之神諸小祭也兵舞執干戚舞帔舞裂彩繪爲拂執以舞鼙言戚也軍中警夜之鼓其聲憂戚司馬法昏鼓四通爲大鼙夜半三通爲晨戒旦

明五通爲發胸九軍動謂軍啓行鼓之使進田與役亦鼓作之日月食伐鼓救之詔王親鼓大喪詔大僕鼓夏官大僕職云大喪始崩戒鼓傳達于四方

按雷鼓等義多附會鄭以八面六面四面解未知何据靈雷用于社冥氏又用之以驅猛獸路鼓用于蒐大司馬又用之以教戰鼗鼓用于軍辟雍又用之以作樂晉鼓用以金奏軍將又用以秋蒐是職所教亦非定法也至救日月鼓世俗之禮春秋書鼓用牲蓋譏之左傳不知云非日月之眚不鼓夏書胤征謂季秋月朔辰弗集于房瞽奏鼓蓋胤征左傳皆後人之

作是書沿襲之耳

舞師下士二人胥四人舞徒四千人

舞師繼鼓人者取鼓舞之義易云鼓之舞之以盡神羣情不鼓舞而能制勝者未之有也故司徒用衆莫先鼓舞凡有事社稷用鼓用舞用牲春秋書鼓用牲于社旱雩則舞故鼓人舞人繼封人而牧人牛人充人皆以所用類附之

舞師掌教兵舞帥而舞山川之祭祀教帔舞帥而舞社稷之祭祀教羽舞帥而舞四方之祭祀教皇舞帥而舞旱暵之事凡野舞則皆教之凡小祭祀則不與舞

祀山川用兵舞取捍禦災患之義帔裂繒爲拂執以舞社稷用之取祓除穰祥之義羽舞執鳥羽舞祭四方用之取飛揚下降之義皇美也用采羽爲帔舞雩用之取百穀豐美之義野舞謂四郊六鄉凡爲山川社稷四方旱暵之祭而學舞者教之謂教舞小祭祀謂州黨禋祭不興舞不帥衆大舞

按舞者禮樂之一藝先王教童者舞所以勞其筋骨調其血脉和柔其四肢使容體比禮步繁比樂借于戚羽施以習武備而是書所言皆其皮膚兵舞帔舞羽舞皇舞名法杜撰非甚典要也

牧人下士六人府一人史二人徒六十人

牧人掌養祭牲故繫封人鼓舞之後郊外爲牧亦地
事此以下至充人三職或謂宜入春官然祭雖屬春
官而犧牲黍稷則地產也作者意在鄭重地官猶五
氣于土耳

牧人掌牧六牲而阜蕃其物以共祭祀之牲牲凡陽祀
用騂牲毛之陰祀用黝牲毛之望祀各以其方之色牲
毛之凡時祀之牲必用牲物凡外祭毀事用羝亦可也
凡祭祀共其犧牲以授充人繫之凡牲不繫者共奉之
六牲謂馬牛羊豕犬雞物各色也牲體全曰牲陽謂

冬至祀天陰謂夏至祀地騂赤色純赤象陽黝黑色
純黑象陰望祀望四方嶽瀆致祀毛之取毛告色純
也時祀郊廟等四時常祀外祭祭外神裂牲體曰毀
如宗伯鬯辜月令九門樂禳之類雜毛曰羶色純曰
犧充人職見下大祀則牧人供犧牲以與充人繫而
養之至期取用小祭祀非時者牧人供牲不授充人
也

牛人中士二人下士四人府二人史四人胥二十人徒
二百人

掌牧牛

按有牧人充人則牛人可省也

牛人掌養國之公牛以待國之政令凡祭祀共其享牛
句求牛以授職人而芻之凡賓客之事共其牢禮積膳
之牛饗食賓射共其膳羞之牛軍事共其犒牛喪事共
其奠牛凡會同軍旅行役共其兵車之牛與其牽徭以
載公任器凡祭祀共其牛牲之互與其盆簠老以待事
公牛猶言官牛待政令待取用也享牛享神之牛求
擇也擇可爲犧牛者鄭謂明日繹祭于廟門外求神
之牛鑿也職作機杙也以繫牛芻之猶養之牢禮謂
殽饗積委積膳賓館之餽膳饗大饗飲賓也食飯也

食禮有酒無獻酬皆于廟各視其命數如上公饗九
獻食九舉九牢之類皆用牛賓射天子與諸侯射于
朝先燕故有膳羞之牛犒牛賞勞三軍喪未葬前飲
食奠于柩朝夕惟脯醢無牲小大斂朔望薦新祖奠
遣奠有牲則供奠牛兵車駕馬載器用之車駕牛御
者在牛前曰牽在牛旁曰傍任用也器版杵斧斤之
類交木懸肉曰互如今屠人以鐵爲連鉤懸牲體解
之亦名互盆以盛血簠竹器以盛腸胃待事待殺也
充人下士二人史二人胥四人徒四十人

充人掌繫養犧牲充肥也凡犧牲養之牧人前祭三

月牧人擇可用者付充人養使肥也

充人掌繫祭祀之牲牲祀五帝則繫于牢芻之三月享先王亦如之凡散牲祭祀之牲繫于國門使養之展牲則告牲碩牲則贊

養牲之處曰牢散猶小也散祭祀謂山川社稷及百神小祀國門城門王城十二門使守門者養牲以城門有隙地可爲牢也展謂祭之先夕省視也碩牲謂祭之晨迎牲入廟告博碩則充人助之